

ALEGRIA Y FANTASIA

BON DIA Aruba



Bataya di media

Ayera tabata nos promé edicion di Alegria y Fantasia pa loke ta trata e aña aki, pero no solamente Bon Dia Aruba a drenta den e ambiente di Carnaval, Diahuebs e famoso y ya caba tradicional programa radial di Ruben "Scorpio" Garcia, esta "Aki Aya" y su ruman chiquito di television "Riba Bow" tambe a cuminzá hinca e bichi di Carnaval den tur hende su curpa.

Esaki kiernen cu ya caba e competencia entre medionan di comunicacion a cuminzá y cu pueblo di Aruba lo tin for di unda pa scohe, ya cu tur radioemisora, corant y planta di television lo ta ofreciendo

nan audiencia of lectornan e mihor programacion e informacion posibel riba nos dushi fiesta di Carnaval.

Top 95 FM no ta bai keda atras, Dialuna lo cuminzá nan programa diario di informacion carnavalesco cu e number di "Boroto di Carnaval" cu lo ta den aire di tres aña consecutivo. Esaki lo ta bao produccion, direccion y animacion di e propio "baas" nada mas y nada menos cu Edmond Croes. For di 6'or te cu 8'or di anochi, bo mester por switch bo radio na Top 95 pa bo sa kiko ta kiko.

Den ramo di television y manera nos a bisa anteriormente, ATV lo conta tur dia di siman for di 8'or y mei di anochi den transmision en bibe cu e pro di Aruba, Ruben Garcia cu a "start" pica, pica cu entrevista di personahenan clave, sobretodo pa loke ta trata e dilema sin fin di SAC y ASOMA, cual te cu awor aki no ta bayendo muchu bon, pero esaki ta un asunto casi mesun diki cu esun di cargozaak, asina nos lo traté brevemente mas dilanti. Tambe e canal aki a primintí di enfatizá den cada un di nan programa carnavalesco e importancia di prevencion di accidente.

Primintí ta mas cu debe, si ta asina, anto preparabo pa loke

TeleAruba lo trece pa e temporada aki, pasobra for di December caba nan a yena nan boca bisando cu nan lo ta e canal oficial di e Carnaval, anto nan mihor bin cu algo spectacular.

Y e ganadornan ta ...

Dia 31 di December notario F. Tjon A Jong a seya e bari den cual lo deposita e formularionan pa peticion pa kavel. Cuminsando Dialuna 6 di Januari y te cu Diabierna 10, e público lo tin oportunidad di pasa busca nan formulario tanto pa kavel, como tambe esnan cu ta deseá di tin un lugar di benta na público na oficina di Domeinbeheer situá na Wayaca.

E sorteo di e kavelnan lo tuma lugar su dia siguiente, esta



Diasabra 11 na e mesun oficina y den presencia di notario. Si bo tin e suerte di ta entre e promé nombrenan di e sorteo, anto bo mester tin na cuenta cu e promé dia pa scohe bo lugar ta Diaranzon 15 y e ultimo ta Diabierna 17.

Tivoli ta start cu candela

Si ainda bo tin sonido di Dandé den bo curpa anto ta mihor bo sacudí duru, duru, pasobra Tivoli no lo sinta warda riba bo. Asina mes, Tivoli Club manera ta un tradicion riba e promé Diasabra di Januari ta iniciá oficialmente e temporada di Carnaval cu e parada di flambeau. Con cu bo kier yamé, esta Fakkelopectocht, Old-



Masque Warm-Up Parade" of parada di flambeau, loke bo no por haci ta keda sin bai y bisa nos Carnaval Bon-bini!

E parada ta programá pa sali for di Marathon Electronics alrededor di 8'or y mei di anochi direccion zuid, bira den Wilhelminastraat bai abao, pa e caba dilanti di e edificacion di Aruba Tivoli Club. Naturalmente tur e pachaga aki lo bai ta animá pa brassband, disco y banda musical.

Prins cu Pancho

Tambe durante e fin di siman aki, específicamente riba Diadomingo anochi lo tuma lugar den Club Caiqueto e eleccion di e lidernan di nos Carnaval, Prins y Pancho den su categorianan infantil, hubenil y grandi. Esaki ta un competencia cu lentamente atravez di añanan, a bai un poco atras y pueblo di Aruba a perde motivacion pa asistí personalmente na e eleccion. Ta spera cu Diadomingo awor lo tin un avalancha di participantenan como tambe público pa animanan. Nos tur sa cu tin hopi talento comico



scondi somewhere riba nos isla y nos lo pasa hopi bon durante e evento aki, esaki ta algo invaluable mas tanto pa e chiquitinnan cu tin e balor di subi riba un escenario y merecidamente tin mester di nos apoyo total. Di e manera aki nos kier a yudabo traha bo agenda di actividadnan pa e fin di siman aki y nos ta spera di wak na cada un di nan apoyando nos Carnaval y di e manera aki un di e tradicionnan mas importante di nos isla no bai perdí. □



KFC

Hendrikstraat # 24
Tel: 23447

CODEMSA

Cumana